



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tiryimyim@aolima



tir yimyim

TAPAK 7

Madhya Pradesh nung BJP-i nangzükba ama inyaksü: PM Modi

UK home secretary Suella Braverman mapa nungi anentsü



VOL. XXI NO. 37 (ADOK 37) DIMAPUR SANGTENNÜ (TUESDAY) YIMPOKSÜI (NOVEMBER) 14, 2023 ₹ 5.00

Centre-i Meitei nunger telok 9 mokdang

Imphal, November 13, 2023 (Agencies): Centre sorkari Manipur nung Meitei telok 9 tashi küm 5 mokdangba osang metetdaksüogo.

Ministry of Home Affairs (MHA)-i Meitei telok 9 tashi "unlawful associations" ta sangoktsüogo.

Meitei teloktem ya Unlawful Activities Prevention Act (UAPA) kübok ozüngi memelaba teloktem ta sangoktsü.

Meitei teloktemji Peoples' Liberation Army (PLA) aser parnok political wing Revolutionary Peoples' Front (RPF), United National Liberation Front (UNLF) aser parnok armed wing, Manipur Peoples' Army (MPA), Peoples' Revolutionary Party of Kangleipak (PREPAK) aser parnok armed wing 'Red Army', Kangleipak Communist Party

(KCP) aser parnok armed wing 'Red Army', Kanglei Yaol Kanba Lup (KYKL), Coordination Committee (CorCom) aser Alliance for Socialist Unity Kangleipak (ASUK) den parnok kübok telok ajak.

Item teloktemi India nungi Manipur balaka razüka linük ka akümtsü nükjidong aliba metetdaksüogo aser parnoki iba nükjidong atema Manipur nung lisopurtem ajungmesor ta Centre sorkari ashi.

Item telok yagi Inida anema tashitem den külemi linük anema mapa inyaksü ajungmesor, civilian tepseter aser police & security force personnel amaker. Parnoki international border adena ozüng alema prangpong-injang shibelener aser public dang nungi senotsü meshia mapa tamajung inyaker ta MHA sangdong nung metetdaksü.

Northeast temekongba akümtsü

Guwahati, November 13, 2023 (Agencies): Northeast kübok state aika nung tan hopta tzünglu arutsü aser iba ajanga temekongba akümtsü.

Northeast state tem nung tan hopta tzünglu arutsü ta Regional Meteorological Centre (RMC)-i metetdaksü.

November 17 aser 18 anogotem Assam, Meghalaya, Manipur, Mizoram, Nagaland aser Tripura nung tzünglu arutsü

ta RMC-Guwahati-i metetdaksü.

November 15 nunga Nagaland, Manipur, Mizoram aser Tripura kübok tesem kar nung tzünglu terara arutsü ta parnokisa ashi.

November 16 nü Assam aser Meghalaya nunga tesem kar nung tzünglu terara arutsü. Kasa anogo Mizoram aser South Tripura nunga tesem kar nung tzünglu terara aser kar nung tzünglu kanga arutsü.

Universal Immunization Program (UIP) atema senden amen

Kohima, November 13, 2023 (DIPR): November 13, 2023 nü Universal Immunization Program (UIP) atema State Task Force Meeting amen.

Health & Family Welfare department-i teküpoktibajenjang nung immunization mapa inyaksü tenangzükba lir ta Health & Family Welfare Principal Director Dr. Ritu Thur-i ashi.

December 2023 tashi nung India nung measles aser rubella samatsütsü alizüng lir, ta pai ashi.

H&FW department ya tongtired lir aser sendaktepa aliba department temi sabang balala ajanga immunization mapa inyaksü ajungmesotsü ayongzük ta Dr. Thur-i mepishia metetdaksü.

Health & Family Welfare department-i health units maliba tesemtem nung itashia village outreach health aser nutrition days agir, ta paisa shisem.

Paisa sendaktepa alirtem, lokti lenirtem aser sendaktepa aliba

department tem dang medical department maparen nung yariteptsü aser talisa immunization mapa nung yaritsü ayongzük.

Sorkari vaccines agütsür anungji Social Welfare aser Education ama department temi külem atongtsü atema inyaksü ayongzük ta Dr. Thur-isa metetdaksü.

State Task Force senden nung Health & Family Welfare Additional Secretary S. Tainu-i immunization program nung partner departments ajanga yaritepba atema pelaba metetdaksü.

Tainu-isa partner departments dang osang prokshitsü aser practical service delivery nung yariteptsü ayongzük.

Senden nungsa Dr. E. Motsuthung Patton (MD, NHM) aser Dr. Imkongtemsu Longchar (SIO, UIP) nunger aden aser parnoki Universal Immunization Program (UIP) alizüng indang lemsatap.

Mizoram anasa Myanmar Army aser CDF rarar

Guwahati, November 13, 2023 (Agencies): Myanmar Army-i democracy pusemba telok Chinland Defence Force (CDF) den khatepba ajanga Mizoram kübok Champhai district nung 'red alert' sangdongogo.

Hombarnü Myanmar Army tayimtsütem ajanga Rihkhawdar yimtsüng anasa bomb ana pokdaksü. Iba ya Mizoram kübok Zokhawthar yimtsüng nungi kilometre 4 shi dang pilar lir.

CDF-i Rihkhawdar yimtsüng nung Myanmar Army camp ka makdokba sülen rara parnok tsüngda khateptsü tenzük.

Mizoram nung Indo-Myanmar arrtsü anasa parnok khateper aser Myanmar Army-i

tayimtsü amshir. Ajisüaka India tsütsübo lendong atalokba osang kecha mali.

"Deobar nikongdang nungi khatep tenzük aser aonung piyong khatepogo. International border anasa bomb apokba osang lir saka India tsütsübo lendong atalokba osang kecha mali" ta Champhai deputy commissioner (DC) James Lalrinchhana-i ashi.

Tensa mejungi akümba ajanga Mizoram-i refugee tem atema kishi lapoktsüogo. Nisung 1000 tema Mizoram nung arua jenoka lir aser nisung 17 tashi Champhai district hospital nung anioka anepaludar.

Centre sorkaribo Myanmar

den arrtsü shibangtsü aser Chin refugee tem indang biometrics agütsü tetuyuba agütsüogo saka Mizoram-i tashi mangai Myanmar nungi arurtem jenokdaksür.

February 2021 nung Myanmar Army-i sorkar atsüngdoker yimsü asütsü tenzükba sülen nungi Mizoram nung nisung aika arua jenoka lir.

Myanmar aser Bangladesh nung Chittagong Hill Tracts nungi nisung 60,000 shi ka Mizoram nung jenoka lir ta Mizoram minister Lalruatkima-i ashi.

Myanmar nung Chin nunger ya Mizo nunger den kasa lir ta Mizoram sorkari ashir.

Dimapur nung tanur 3 dena nisung 5 rongset

Dimapur, November 13, 2023 (TYO): Deobar aonung 10: 45 ako meta Dimapur kübok Naharbari kiyong nung kitsükkirong lendong ka nung nisung pungu rongset.

Iba lendong nung kibong ka nungi tanur asem dena nisung pungu rongset.

Diwali benjungmong nung fire crackers/diyas amshiba ajanga kitsükkirong lendong ataloktsü asütsü akok saka bushisüngdang südar ta Fire & Emergency Services ketdangsür kati ashi.

Tasürtemji non-Naga nunger liasü aser parnok mang police ket nung agütsüogo ta ketdangsürisa

ashi.

Iba lendong nung ki aika rongdok aser kibong 50 shi talidak maka kümogo.

Mi enseptsü atema Central station, West aser Chümoukedima nungi fire tenders 6-i ghonda ka ser tesadang ka shi agia mi azüokteta liasü.

SIEMAT-i kaket 2 aser video documentary ka saya



State Institute of Educational Management and Training (SIEMAT) Hall, SCERT Kohima nung kaket ana den video documentary sayaba sentong nung agiba noksa ka angur.

Kohima, November 14, 2023 (DIPR): November 13, 2023 nü State Institute of Educational Management and Training (SIEMAT)-i kaket ana sayaogo.

SIEMAT Hall, SCERT Kohima nung "A Study on the School Development Plan in Nagaland" aser "Report on the Project on Continuous Professional Development (CPD) Module & Diary for School Heads" kakettem saya.

Kasa sentong nungsa Director SCERT, Kevirale-ü Kerhuo-i "An Extra Mile" ta ser GMS Jakhama indang video documentary ka sayatsü.

SIEMAT aser SCERT nung Joint Director Achetla Ao-i anir School Leadership Academy (SLA) Team ajanga iba mapa tajung inyakba atema tenüngsang agütsür ta Director Kevirale-ü-i ashi.

National Education Policy (NEP) 2020 ajanga knowledge, skills aser experience nung maneni angazütsü aser research agütsü ajungmesor ta lai ashi.

SIEMAT-i Kohima nung aliba school 20 nung School Development Plan (SDP) research agi liasü aser iba ya education system tajungba melenshitsü atema lir.

Director Kevirale-ü-isa sorkar dang school tekolakpurtem asoshi Continuous Professional Development (CPD) Module tenzüksü ayongzük.

Government Middle School Jakhama nung headmaster-i shilem tajung agiba ajanga video documentary yangluogo aser iba ajanga tanüngba school tem ajungmesotsü imlar ta laisa metetdaksü.

Iba sentong nung SCERT staff aser Government Middle School Jakhama kaketshirtem aden aser Reader SCERT, Benjungdenla Yaden-i anküp tepela o jembi.

NAGALAND CONSERVATORY OF MUSIC
Presents

Les Miserables

ANOTHER DAY, ANOTHER DESTINY

NOVEMBER 2023
23rd Rs. 5000 Admit 4
24th Rs. 2000 Admit 2
25th Rs. 2000 Admit 2

VENUE
LORIN HALL, TETSO COLLEGE
INFORMATION & RESERVATION
+91-7630-803977+91-9366239275

Supported by:

Longleng nung World Pneumonia Day amung

Dimapur, Yimpoksi/Nov. 13 (TYO): Linik ajunga den külemi November 13, 2023 nü District Health Society Longleng ajanga "Every Breath Counts: Stop Pneumonia in its Tracks" omen nung ajemdaker World Pneumonia Day munga liasü.

Iba anogomung ya CMO Conference Hall, Longleng nung agia liasü aser kasa mapang tesemdanger tongti Dr. Samuel Akho Konyak P. NCS, EAC Longleng liasü aser SAANs (Social Awareness and Action to Neutralize Pneumonia Successfully) tenzuka liasü.

Iba sentong nung Dr. S. Imnameren Phom, DPO (RCH/UIP) Longleng ajanga World Pneumonia Day indang rateta ashi aser SAANs tenzükja liasü.

Pneumonia samadaksütsü aser alima nung mopung temürek nungdakba nüburtem nem angatdaksütsü nükjidong

nung küm shia November 12 nü World Pneumonia Day amunger, ta pai ashi.

Pneumonia aser danga tango sashiba nung timtem agütsüba tashidak samatsütsü asoshi alimai inyaksü nungdaker, ta Dr. S. Imnameren Phon-i ashi aser iba anogomung nükjidong ya India nung 2025 tashinung pneumonia agi tanur asüba ajemdaksütsü lir ta ashi.

Tesemdanger tongti Dr. Samuel Akho Konyak P. NCS, EAC HQ Longleng ajanga World Pneumonia Day aser district nung SAANs tenzükba ya kanga tongtipang lir ta ashi.

Pai iba sentong nung shilem agir ajunga dang pneumonia asoshi awareness agütsüba nung tongti shilem agitsü ayongzük aser arogo temia shilem tajung agitettsü ta ashi.

Arogoi awareness prokshiba aser kilung nung mopung

menenba aziükba nung shilem tulu agitettsü, ta pai ashi. Paisa ajak dang bendanga agütsür iba tashidak aziükba nung shilem agitsü ajungshia liasü.

Iba sentong nung menden Henmei, DCM liasü aser Tanlei, Pastor, Muli Baptist Church ajanga sarasademer sentong tenzük.

Viroli Sangtam DPM, NHM ajanga sentong nung adener pela agizükba o jembiba den iba anogomung rateta ashi aser iba sülen Lipom-i melepzüng o jembia liasü.

Iba sentong nung Longleng district kübok arogo balala nungi pastor tem, ASHAs, CMO staff, NHM staff aser IDSP staff tem dena liasü.

Kasa mapang SAANs tenzükba sentong ya Longleng district kübok PHCs, CHCs, HWCs aser SCs ajunga nung agia liasü.

Peren nung SAANS tenzük, World Pneumonia Day amung



Dimapur, Yimpoksi/Nov. 13 (TYO): District Health Society, Peren ajanga November 13, 2023 nü Social Awareness and Action to Neutralize Pneumonia Successfully (NAANS) tenzük aser District Hospital Peren nung World Pneumonia Day munga liasü.

Tila tanur arishi küm pongu tekübok alirtem dak pneumonia tekeraba nung puteta anepalutsü aser awareness agütsütsü mechi SAANS campaign ya tenzük.

Dr. Rukuwe Thelie, Paediatrician, DH, Peren ajanga SAANS indang PowerPoint presentation tatsüka agüja liasü.

Pai iba mapang SAANS indang nükjidong aser inyakyim tongmelang agi lemsatsep aser arishi küm pongu tekübok tila tanur dak pneumonia puteta

anepalutsü aser awareness agütsütsü nükjidong nung iba campaign ya tenzük ta ashi.

Pneumonia ya tepokpok nung atemba tashidak ka lir, koba bacterial, viral aser fungal infection lir. Childhood Pneumonia anema awareness tali agütsütsü aser tekeraba nung puteta anepalutsü yimyatem indang pai rasaa ashi.

Iba sentong nung tesemdanger tongti, Keyirangding Hegui, ADC, Peren ajanga o tatsüka jembidang health worker temi bendanga agütsür district nung health dak sendakba maparen balala meranga inyakba atema pelaba lemsatapa liasü.

Ossetsüet nungdakba ajak agütsütsü aser nungdakba mapang yaritepsü renema lir, ta pai ashi.

Pai iba sentong nung shilem agirtem dang pneumonia tashidak aliba yimyatem jangjatetsü asoshi awareness agütsütsü aser ajak lungjemer iba campaign takok ngua agitettsü ayongzüka liasü.

Iba sentong ya Tening CHC aser Ahthibung PHC nunga tenzük liasü.

Iba sentong nung district administration, Social Welfare department nungi ketdangsürtem, health workers aser ASHAs tem dena liasü.

Iba sentong nung menden Zochilu Venuh, BPM Peren Sadar liasü aser Dr. Supongmenla Walling, DPO (RCH&UIP) ajanga tarur pela agizükba o jembiba aser Dr. Meningsiliu Rentta, Obs & Gynea, DH, Peren ajanga melepzüng o jembia liasü.

DC Kohima ajanga ak tepsettsü nokdanga aliba agientsür

Dimapur, Yimpoksi/Nov. 13 (TYO): Sechü/Zubza nung African Swine Fever poktetba Infected Zones and Surveillance Zones (ASF) nungi ak aser akshi bener arua ayokba, ak/ak chanu bener aruba/aoba aser ak tepsetba nokdanga aliba tang nungi agientsür, ta Deputy Commissioner, Kohima, Kumar Ramnikant-i November 13, 2023 nü sangdong ka ajanga ashi.

Ita ana süyiba aser Government of India ajanga

lateta yutsüba 'National Action Plan' for Control, Containment and Eradication of African Swine Fever (ASF) indang protocol nung aliba ama inyakba aser tashidak tasen adokba osang maliba ajanga iba totuyuba ya agütsür, ta ashi.

Nüburtemi kanga junga mürekmejua bio-security mera agitsüla aser saksalema alitsüla aser ak asüba mesüra shirangba osang ketdangsür nem metetdaksütsüla, ta sangdong ajangasa ashi.



Dimapur - Kohima lenmang nung Medziphema anasa Jharnapani nung ainlen jajaritem atema chiyongdak tesem mesemteta alidak tawa Ao Hotel tajung ka lapoka lir. Yangi chi tajung den shi , ango tajem aser takong nüushi (enüshi) nung asoba den süngolemba , kala dal, rosep aser lon tajung tapu balala merükmerüka awazür agütsür. Ibai oli oradang pei ki ama bilema anisüngzükdak aser metsümeshitak tesem tajung ka lir. (Medziphema, Nov.13, 2023.)

Dimapur-Kohima lenmang yangluba semdangtsü

Dimapur, Yimpoksi/Nov. 13 (TYO): Dimapur Bye Pass (Nagaland Portion) aser Dimapur-Kohima 4 Lane National Highway (PKG I & II) semdangtsü aliba anogo melenshia item tesem ya November 15, 2023 anüngdang 11:00 ako nungi semdangtsü, ta Deputy Commissioner, Chümoukedima, Abhinav Shivam, IAS ajanga sangdong ka nung ashi.

Item tesem semdanga telok nung Deputy Commissioner, Chümoukedima; Revenue Officer, Chümoukedima; General Manager (P), PMU-Dimapur, NHIDCL; DPRO Chümoukedima; Authority's Engineer aser General Manager, E.P.C. Contractor alitsü.

Parnok ya Patkai junction nung adenshitsu aser tesem balala semdanga aotsü, ta sangdong ajanga ashi.

Angh aser NSCN/GPRN ajanga Ahuna benjong salem lemsatsep

Dimapur, Yimpoksi/Nov. 13 (TYO): Sumi nunger adianu Ahuna benjong amungba mapang ni iba benjong salem abener, ta Nagaland Angh La Ganesan-i sangdong ka ajanga ashi.

Ahuna ya akhi mapang nungi Sumi Naga nunger alu aruba sülen amungba benjong ka lir aser ibai tepela lemsatsepba benjongmung ka lir aser ano küm tasen nung temoatsü aser alu junga arutsü asoshi tanüla jazükba benjong lir.

Ibai takok ngua alu aruba tembangba aser achi-ajemtsü lemsatsepba tepela benjong ka lir. Iba benjongmung tanüla agi asenok tamang akangshitsu aser asenok tesunep aser yimshiyimjung leni anitsü amanger. Iba benjongmung nung nenok ajak tepela aser anema alitsü moatsür, ta Angh La Ganesan-isa ashi.

NSCN/GPRN (Akato Chopi) indang sangdong ka nung, November 14 nü amungba Ahuna benjongmung salem Sumi Naga nunger ajak dangi abener, koba International Children's Day den külemi mungshir, ta ashi.

Iba benjongmung nung sobaliba maparen balala inyaka amunger aser talisa 'Mithun' (sü) anir yimtung süa jajar aser ibaji ajanga lokti nung yimchiyimjung aliba sayur, ta sangdong ajanga ashi.

Iba benjongmung nungya alu nungib rozükba ji taki (Bamboo Pole) nung asor aser lemsateper.

Iba Ahuna benjongmung ajanga asen Sumi nunger adianu aser adianutsürtem maneni yimchiyimjung tashi, telungjem aser tesendaktep aniba tashi lidakjang ta sarasademer, ta sangdong ajangasa ashi.

**GOVERNMENT OF NAGALAND
OFFICE OF THE LABOUR COMMISSIONER**

NAGALAND: KOHIMA
New Capital Complex

ADVERTISEMENT

// Dated Kohima, the 13th Nov, 2023

No.LBR-964/84 (Vol-I) : In pursuance to the Government approval letter NO.LAB-1/6/2022-2023/309dated 19/10/2023 applications are hereby invited from indigenous inhabitants of Nagaland for filling up the post of Multi Tasking Staff as shown below under the Department of Labour, Nagaland, Kohima.

Name of the Post	Total Number Vacancy	Establishment	No of Post	Pay Matrix
MTS	5	Office of the Labour Commissioner, Nagaland, Kohima	2	Level -1 (PB.4440- 17200)
		ALC Office, Kohima	1	
		Labour Welfare Centre, Dimapur	1	
		ALC Office, Dimapur	1	

Eligibility & other conditions of Advertisement

- The second post is reserved for Konyak Tribe (Naga) in the Office of the Labour Commissioner, Nagaland, Kohima.
- The candidate applying against the post vacant at District ALC Office, Kohima shall be indigenous inhabitants of the concerned district.
- Minimum age of a Candidate should not be less than 18 years as on 01/11/2023 and not more than 35 years of age as on 01/11/2023. The relaxation of upper age limit will be governed by the existing policy of State Government, including those serving employees under State Government.
- Serving Govt. Employees are required to submit "No objection Certificate" duly signed by the Head of Department with name and Official Seal, indicating the date of initial appointment of the candidate.
- Application form may be obtained from the Office of the Labour Commissioner, Nagaland, Kohima, during Office hours from 10:30 A.M to 3:00 P.M from 14/11/2023 onwards. Last date for accepting application shall be 27/11/2023 till 3:00 P.M.
- Incomplete application shall be summarily rejected.
- Updated Employment Registration Card (Photocopy) should be produced.
- The minimum qualification shall be Class VIII (eight) passed.
- Mode of selection shall be through Viva-voce. Shortlisted candidates shall be intimated through phone for Viva-Voce on 30/11/2023.
- Candidates should provide their Whatsapp Contact No / Email ID to this Directorate and should readily be available on call.
- Candidates called for Viva-Voce shall produce the following documents in Original.
 - Academic documents.
 - Indigenous Inhabitants Certificate.
 - Schedule Tribe Certificate.

Sd/- (Er.S.L. WATIAIER)
Labour Commissioner
Nagaland, Kohima.

Phone : 0370-2270132/2270135/2270143/2270174/Fax: 0370-2270132 (Off) Email: - labcomm-ngl@nic.in

Mopung temenentiba yimti 10 rong-nung Kolkata aser Mumbai-a densemogo

New Delhi, November 13 (Agencies): Alima nung mopung temenentiba yimti 10 rongnung India nungi Delhi dang liasü, ajisüaka Diwali benjung mapang firecrackers amshiba agi iba benjung sülenbo alima nung mopung temenentiba yimti 10 rongnung Kolkata aser Mumbai nata densemogo, ta Hombarnep osang ka ajanga metetdaksü. Alima nung air quality index (AQI) tamajungtibaji New Delhi (420) lir aser ibaji 'hazardous' category nung lir. Amongnü India tesem ajaklen Diwali benjung amongba sülen anogo ka dang lir Hombarnep alima nung mopung temenentiba yimti 10

rongnung Kolkata jenjang 4buba aküm (AQI 196) aser Mumbai jenjang 8buba aküm (AQI 163). India linük nung asükwa mongpu atongtsü mapang mopung quality kanga mejungi akümer, aser ibaji temperature kanga ajema akümba den külemi gari aser industry nungi mokozü, kisü-jensüba ajanga auyi aser alu nung jana rongdokba agi lir. Iba dak alia Diwali benjung mapang firecrackers tali amshiba agi mopung kanga menener. AQI level 400 nungi 500 ajanga temang anema alirtem-a kongshir aser tashidak keta alirtembo kanga mejungi kongshir. AQI level 150-200

ajanga asthma tashidak, tepokpok aser temelungjang tashidak alirtem mejungi kongshir. AQI level 50 tashibo junger, ta züngshir. Central Pollution Control Board data ajanga ashiba agi, yaküm Diwali mapang nung Delhi nung AQI 312 liasü; Diwali mapang nungsa 2021 küm Delhi nung AQI 382, 2020 küm 414, 2019 küm 337, 2018 küm 281, 2017 küm 319 aser 2016 küm AQI 431 liasü. Hombarnep Delhi tesem aika nung AQI level 500 dak tema liasü. Jawaharlal Nehru Stadium nungbo AQI 910 liasü, Lajpat Nagar nung 959 aser Karol Bagh nung AQI 779 liasü.



November 13, 2023 nü London nung India External Affairs Minister S. Jaishankar aser pa kinüngtsü, Kyoko Jaishankar nati UK Ato kilonser, Rishi Sunak aser Akshata Murty na ajurudang tangokba noksa nung angur.



November 13, 2023 nü Mungeli district nung Chhattisgarh Assembly elections atema nüboyimba lokti senden ka nung Ato kilonser, Narendra Modi adendang tangokba noksa nung angur.

Madhya Pradesh nung BJP-i nangzükba ama inyaksü: PM Modi

Barwani, November 13 (Agencies): Hombarnü Ato kilonser, Narendra Modi-i Madhya Pradesh state nung alirtem dang, state assembly election nung BJP-i takok ngua sorkar akümba sülen party-i nangzükba ajak inyaksü, ta metetdaksü. Paise, Centre sorkari angati ration agütsüba scheme ajanga nisung crore 80 ayimjemer, aser pongu atsülangtsü, ta metetdaksü. Barwani nung election nüboyim lokti senden ka nung jembidang pai, "Nenok dang nangzükba ajak ataloktsütsü. Ibaji ni nangzükba," ta ashi. Congress party aija Ato kilonser Modi-i, Congress-i takok angütsü atema hon agi ki yanglutsütsü, ta nangzüktsüa akok, ta ashi. November 15 nü Bhagwan Birsa Munda asoba anogomong amongba dak sendakba nung

Modi-i, "Iba anogomong ya 'Janjatiya Gaurav Divas' asütsü, ta sangdongba ya BJP sorkar atema nümatangtsü lir," ta ashi. Modi-i, India nung tribal nüburtem ajanga linük sobaliba ajungkettsür, ta ashi. Paise India nüchiso atema tribal nüburtemi raraba atema tenüngsang agütsü. "Congress sorkari tribal nüburtem sendok, ajisüaka BJP-ibo tribal nüburtem nem akhümket agütsü," ta pai metetdaksü. Paise, election mapang süaka pai artsüleni oa sepaitem den Diwali amongba metetdaksü. "Iba election ya tarütsü nung Madhya Pradesh jenjang tajungba akümtsü atema lir," ta pai ashi. State Assembly nung menden 230 aliba state nung November 17 nü election agütsü aser December 3 nü vote azüngtsü.

Uttarkashi nung aliba ongken ka nung nisung 40 anenbanga lir

Uttarkashi, Yimpoksüi/ November 13 (Agencies): Amongnü anepdang Uttarakhand state kübok Uttarkashi district nung Silkyara aser Dandalgaon tsüngda Brahmakhal-Yamunotri National Highway nung tang teyangludak ongken (tunnel) ka chirepba lendong nung aayanger 40 anenbang aser tang tashi mekümküketi lir. National Disaster Response Force (NDRF), State Disaster Response Force (SDRF) aser Uttarakhand Police senteper parnok kümkütsü merangdar. Gari senzütsü atema atuba ongken (tunnel) anenbangba mapang nungji yangji mapa teinyakdakupur nisung 40 shi liasü. Parnok den tongtepratep süteter, ta ketdangsertemi metetdaksü. Hombarnü state Chief Minister, Pushkar Singh Dhami den ketdangsertemi iba tesemji semdanga osang metetpelaogo. Ato kilonser, Narendra Modi-ia phone ajanga Chief Minister Dhami den osang metetpelaogo. Brahmakhal-Yamunotri National Highway nung tunnel tesem ka chirepba osangji anepdang 8:45 ako nung ang jangjia liasü.

Osangbener den jembidang Superintendent of Police (Uttarkashi), Arpan Yaduvanshi-i, tunnel ji Amongnü anepdang 6:00-7:00 ako meta chirep, ta metetdaksü. Uttarkashi District Disaster Management Officer Devendra Patwal-i, "NHIDCL-i anepdang 845 ako meta onok nem iba osang metetdaksü. Iba lendong ya tunnel tetenzükdak nungi metre 270 shi pilar atalok. Ongken chirepba janaji tasazük metre 30 tashi lir," ta metetdaksü. Tunnel atudak mapa inyaker 40 ji teimbaka Jharkhand, Uttar Pradesh, Bihar, West Bengal aser Odisha state tem nungi aayangertem lir. Mapa inyakerterem rongnungsa Assam nungia nisung ana aser ka Himachal Pradesh nungi lir, ta District Emergency Operation Centre-i metetdaksü. Uttarkashi Circle Officer (CO), Prashant Kumar-i, "Yashi (Amongnü) onoki parnok den tongteprateptetogo. Onok tunnel telung jagi metre 15 tashi itetogo. Parnok ajak kümküka lir aser parnok nem 'pipe' ana ajanga chiyungtsü takong, tzü aser oxygen agütsüogo," ta metetdaksü.



TIR YIMYIM YIMOBILEM (EDITORIAL)

DIMAPUR SANGTENNÜ, YIMPOKSÜI (YIMPOKSÜI) 14, 2023

Yi ayok tajungba na ?

Dimapur nungbo yi ayoktsüla ta lokti tentettem ajungai ola adoker kechiyong Nagaland nung yi meyanglutsü aser mayoktsü ozüng zünga liaka yi talubosa angur aser teyanglua yanglur. Ano, kanga takoksa kaji Dimapur aser temeket nung yangluba yitemji mozü shitak amshia yangluba yi masü, anungji yibo yi ser nung yi dang nungi tamajungba saka ano jenjangbo kanga tasak. Aji oda, yi tamajung jenjang tasak agi alia ajemba ajanga yijemer aika anojungi tashidak adoka asür aser ano külen ozüng anema yi yanglur aser ayokertembo takar akümer. Ibayongji, Nagaland nungsa süaka Dimapur nungbo yi yokdaktsüsüla ta Naga Council—i anir lokti tentettemi akangba angashir. Ano, kuli kaji Dimapur nung yi meyakaka Nagaland süngküm ajangli Assam tsütsübo yi ayokba dokan aser bar agi süngogo. Itemji Naga nungertem nem lapoktsüba yi dokantem lir. Item kulitem jagi Nagaland nung yi meyanglutsü aser mayoktsü ozüng lateta aliba ya menüngdaker. Anungji, ozüngji salajang aser yi jemnertem atema yi tajung sen dalang agi alia jemdakjang aser yi yoknertem asoshia ozüng kübok yi yokdakjang ta ashibaji tim dang lir ta angateter. Ajisüaka, yi yokdakjang aser yi tajung sen dalang agi alia jemdakjang ta ashibaji Nagaland nung yi yangludaktsünüba aser Naga nungner nem yi jemdaktsünüba tangatetba nung ashirbo masü saka yi meyanglutsü aser mayoktsü ozüng lateta aliba ya shitak amshidaktsünüba agi tezüdang o ka dang asütsü ta bilemer. Tang Dimapur nung yi yokdakjang ta ashirtemji yi jemer masü aser ano yi yoknertema masütsü, kechiyong parnokji lokti lenirtem aser arogo nungertem lir. Ajisüaka, parnoki ashiba nung tagitsü ken o ji, yi mayoktsü ozüng azüng süra ozüngji shitak amshia teyokdaktsü, saka ozüngji mamshitetra yokdakjang ta ashirba lir ta angateter aser aji shitak lir. Atangji, Nagaland nung yi mayoktsü ozüng liaka, taoba tatar senden nung bendanglen nungi arur raliwalirtem asoshi parnok anendak hotel-tem nungbo ayoktsü atema temelaba agüja lir, anungji raliwalirtem ayipdak hotel tajungtem nungbo yi angur. Nagaland nung yi ayoktsü nungdak süra iba jagi teperia ta bilemer. Iba dakji alaka yi mayoktsü ozüng mamshitetba agi yi ayoktsü telemtetba agibajibo shisa maka asütsü. Iba amajisa ao nungbo, drugs achir kanga bolua akümerji drugs yaa menokdang tajungba ta ashitsüji melarmelar asütsü. Joko, alima nung nisungtem tejen sobaliba agi alener aliba agi alaker aser sademsadema linür, anungji yi ayoktsübaji dang masü saka kibalembu nunga kin kidong mashishitsüla ta kümdagi aser asen lima nunga tetsür o tetsür na aser tebur o tebur kibong kümer apuani süa alitsü atema memenui arogoi temelaba agütsütsü amato kümdagi. Yi ayoktsüba ya achi-ajemba sobaliba aser rongsen bushiba lenmang ka dangbo masü, ibai nisung taküm ka libaliru nung tajung asü tamajung ? Tim asü masü ? ta asüba "moral issue" ka lir. Aji oda, asenoki asen chirnurtem dang yi jemang ta majungshitet tashi aser arogo nungner süaka asenbo kibong mesütsü yi dokan ka lapokdi ta meshitet tashi yi yanglutsü, ayoktsü aser ajemtsübaji tim mapa ka masütsü. Atangji, yi ayoktsü nungdakba onük nung ya lokti tentettem ola tuluba tuluba akümdang arogo lenirtem aser lokti tentetsa süaka tetsür lokti tentettem olabo maliba-maliba akümba meteter. Tetezü, arogoia aser tetsürtemia yi ya ayokang tajungba ta bilemer südi. Anungji ayoktsüla asü ? Iba onük nung tebilemdangtsü kaji arogo nungner kati yi dokan ka lapok nung parji arogo nungi endoktsü asü meindoktsü ? Yi ayokba nungi ter shilem tenla abenba senji agizüktsü asü magizüktsü ? Yi ayoker arogo nungi meindokra, arogo aser mungdangia yi ayokba aser ajembaji tai malia ta ashitsü asü koda ? Itemji bilemdanga alidang, Nagaland nung yi yoknüba ya government sen aatsü atema bilema inyaker asünungbo, asenok taintem mashimaluba agi state ya anepalu mesüteter dang ashi, lanurtemibo yi ama temesepba yokdaktsüba nungi aruba sen senpak kata magii Nagaland ya alima agi kotak küma yangertetsü.

OLEMSABANG

Tesüiba Putu-i Inyaka Yutsüba lemtet tem Meputeper ya metemdanga meyiba Reprangshidangtsü koda

~ T. Imti Jamir

Tanü asen tendak Baptist Arogo tenzükba nung tera mangateptep atoka lir ya asenok shinga tsutsü a masu saka otsü jagi kechi ashir iba dakji ajemdaker/rangloker tebelemba angutsü merangtsüdangtsü atema shisa lemsatepdanger. Iba ken o ya Dr.Clarki inyakba mapa asunung pai kechi zuluua yutsü iba nungi mepilatsüla merangtsüla kechiaser iba ya tongtibangtiba primary source ji aji asutsü nungdaker. Tanabuba nung yim ana version mesura parnok publications lira itemji secondary source asutsüla.

Tasembuba nung Record tejangja bushitsü atema ABAM ajanga research committee balala shima inyakdaktsübatemji kanga tongtibang asutsü, iba putu mapang alir aika asen den taküm mali, saka parnoki pushiteta yutsübaji kangasa senti oset ama sungshitsüla, iba den kulemi tanü shirnok taküm lir tesuiba mapang Rev tem, lenir balala-i anir ani belem jenti agia tetsüng agi jaja ochiba inyaktsü meranga pushia toktsübatem, parnoki kechi ashir, parnok shisatsü aji kanga tongtibang asutsü kechiaser ajangshia aruba den tatalok aika parnoki mezüng pur nungi angazüka aliba otsü tem asutsü.

1980 Oct 10 nung research join committee den ABAM executive committee -i lemetetba aser Nov 4-6 meeting lemtetba na (Contrary)meputeper tashishitsu tongtibang kar lir amai ajiteter sera ya shir mapa asutsü, anungji ya metemtanga reprangshitsüla. 1986 ABAM lemtet ya küm ishika research agir mezüng Missionary 4 aser parnok kinungtsü records aser 1940 nung yimnasanger arogo ana report nung telemtetba agiba sura aguja aliba lemtettemji reprangtanger metemdanga zungdangtsü atema lemsateper.

OFFICE OF THE
AO BAPTIST AROGO MUNG DANG
IMPUR: MOKOKCHUNG NAGALAND

No.ABAM(ESTB-2)95-96/237

Dated Impur the 7th March'97.

To,

ABAM Executive Committee Members.

Temeim Lennirtem,

Taoba march Meeting nung ABAM 1986 Special Committee report nung sendakba onük tesülen jempitsü anünga nung sendakba tongtibang documents kar idaki yoker. Item ya study sür arya 30th April nung sentepdang telemtetba agitsü.

- I. 1872-1973 mezüngbuba ABAM Executive committee meeting : Memo: ABAM-ECA/ 1/72-73 dated Impur, 5th October, 1972, Molungyimjen Arogo küm 100 Jubilee among atema ABAM-i Special Committee ka yok aser iba Special Committee report agütsüba nungi ABAM Executive Committee-i bilemdanger yamai lemteter.

Molungyimjen Arogo tenzükba küm 100 ubileeji Dr.Clark record-i tuyuba ama küm agi mabensa nungji ABAM-i shilem magir. (Ibai terongdak asüba agi Mungdang tenüng nung Executive Committee -i inyaker

II. 1980 Ao Mungdang November 4-6 Resolution No 42.

Molungkimong Arogo otsü nung koba mangatettep mapang talangka kaa aru ibaji tembanga reprangshitsü atema iba Special Committee Mungdang tenüng nung Mungdang mendenpubai shimteta agütsür. Iba yagi temalen inyaka aliba maparen ajunga shisadanger kechi tatempang arudir aji tatempang asütsü Mungdangi parnok nem tashi ajak agütsür:

ABAM 1980 Special Committee members:-

- | | |
|---------------------------------------|----------------------------------|
| 1.Rev. A.Temjen Impur (Convenor) | 10. Yangpenchang Pastor, Aonokpo |
| 2.Apong Pastor khari (Secretary) | 11. Imtitongzük Pastor Süngratsü |
| 3. Dr.Renthy Keitzar ETC Jorhat | 12.Longcrimba Pastor Yimyu |
| 4.Mr.Ayutemjen Mokokchung Town | 13. Süpongmeiba Pastor Changki |
| 5.Mr.Pangyangliba Mokokchung Town | 14.Kajenkaba SIS Wokha |
| 6. Imtisungküm Pastor Mongsenyimti | 15. I.Toshi Pastor TSG |
| 7. Rev.Chujang Pastor Chungtia | 16. Mr.Yarmong Master BES Mkg |
| 8. Kari pastor Shillong | 17. Tongpanglepden PS Alongtaki |
| 9. Pangersowa Pastor Changtongya Town | |

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nisung asem nem Museum of the Bible 2023 Pillar Award agütsü



November 11, 2023 aonung Washington, D.C. nung Lee Strobel (abelen)-i Christian Broadcasting Network nungi Abby Robertson ket nungi Pillar Award agizükdang tangokba noksa nung angur.

Washington D.C, Yimpoksüi/ November 13 (Agencies): Nisung million aika den Laishiba nung aliba otsütem rateta lemsatepba atema Khristan lenir asem nem Museum of the Bible 2023 Pillar Awards agütsüo.

November 11, 2023 aonung Museum of the Bible (MoB) nung 2buba Museum of the Bible Pillar Awards sentong agia liasü. Iba sentong nung osangtajung ken zülur, Matthew West-i Laishiba ya alima nung otsü tajungtiba kaket lir, ibayongji MoB indang 2023 Gala & Experience sentong nungja "The Story" shim, ta metetdaksü.

Iba award ya yaküm-ang tenzük aser tanabuba Pillar Awards sentong nung Pillar Awards angurtemji Lee Strobel, Greg Laurie aser Kay Arthur nung lir.

Award sentong ya Dave Stotts leniba nung agi. "Drive Through History" ta ajaba educational videos series ajanga nisungtem dang osangtajung kakettem (Mathi, Mark, Luk aser Yohan) nung shia aliba tesemtem sayutsü atema Dave Stotts-i alima tesem balala semdanga liasü.

Stotts-i, Pillar Awards ya Museum of the Bible indang 'history, narrative aser impact' tongshitem lir, ta metetdaksü.

"Item tongshitem ya Pillar awards tentetba tamendakdak lir. Pei sempet, shisatsü aser sabangtem amshiba ajanga

Lashiba tashi amshia item tongshi mesodaksür nija aser teloktem nem tetushi agütsüsi atema yaküm onoki iba awards ya tenzuka liasü," ta paisa metetdaksü.

Taküm Pillar Award agizükertem nem tenüngsang agüja pai, "Khristan otsütem ajanga nisung asemi nisung million aika taküm nung kongshiogo," ta ashi.

Christian Broadcasting Network nungi Abby Robertson-i Lee Strobel, Greg Laurie aser Kay Arthur nung nem award agütsüba sülen sabang nung par asemprong interview agi.

Kasa sentong nung osangtajung kentener, CeCe Wynans-ia ken ka aten.

Taoba mapang journalist aser 'The Case for Christ' kaket zülusang, Lee Strobel-i Pillar Award for history agizük. Sabang nung jembidang Strobel-i, pa mapang talangbaka Tsüngrem dak mamanger ka aliaa aser tesüsa Tsüngrem dak amangba lemsatep.

Pai Khristan yimsü agizükba sülen journalism toktsü aser Khristan tamang tejakleni aotsü atema ranglok. Pa American Christian Arogo asem nung teaching pastor inyak aser pai television program "Faith Under Fire" ketdangsüa liasü.

Kasa sentong nung Pastor Greg Laurie-i Pillar Award for narrative agizük.

Laurie ya Harvest Christian Fellowship nung tongti pastor lir.

California aser Hawaii na nung iba fellowship nung züngsem 15,000 dak tema lir aser hopta shia online ajanga agiba tekülem sentong nung nisung 100,000 dak tema adener.

Laurie taküm otsü nung ajemdaker yangluba film "Jesus Revolution" taküm küm tetenzüklen sayaa liasü. Akhidang America kübok southern California nung "Jesus Movement" mapang nung Laurie-i Khristan yimsü agizüka liasü.

Tanü tashi Laurie-i nisung jenti Khristan yimsü dangi meyipdaksüsi atema inyaker.

Award sentong nung jembidang Laurie-i, "Yisu-i, alima ajaki Arogo dangi aotsüla ta mashi, saka Arogoi alima tesem ajakleni aotsüla, ta pai (Yisu) ashi, ibayongji nisungtem den sendaktepsü atema onoki mapang ajak nung tasa tasen bushir," ta ashi.

Laishiba tesayur aser kaket zülur, Kay Arthur-i Pillar Award for impact agizüka liasü. Arthur ya National Religious Broadcasters' Hall of Fame nunga shimokogo. Iba award sentong agiba anogo ya la arrshi küm 90 ajungba anogo liasü.

Award sentong tembangba sülen chiyungba sentong nung loktii la nem "Happy Birthday" ken tenja liasü.

La indang organization, Precept Ministries ajanga alima nung linük 206 nungi linük 190 denbo Tsüngrem O lemsatepogo.

ANOGO ABEN TSÜNGREM DEN

Tesendaktep 1 Tesa. 4: 1-8

ATSÜABUNG MEDEMBA - KHRISTAN TANGATETBA

Aser tena prongla mangsa liasü, nisung o pa kinüngtsü na, aser maktepi liasü. Lipok 2:25.

Laishiba nung iba o jakdaka dang ashiba jagi Tsüngremi atsü-abung medembaji Tsüngremi saklokba mapa ta sayur. Pai ibaji yanglu. Idakji kecha tamajung mali. Adam aser Eva mangsa liasü saka kecha maktepi liasü. Temenen malidanga, atsü-abung medembaji liasü. Tsüngremia ibaji junger ta ashi. Ibai taaktsü o ka masü.

Ano item O yagi satitsü atema Tsüngremi atsü-abung medembaji yanglu ta sayur. "Anungji nisungi pei tebu aser pei tetsü toktsür, pei kinüngtsü den sentepa alitsü; aser tena shi ka dang alitsü" (Lipok 2:24). Iba telungjem nem Teyanglur -Tsüngremi ozüng aser temoatsü agütsü. "Aser Tsüngremi parnok moatsü aser Tsüngremi parnok dang ashi, "Soyapokyang, aser jenti renang, aser alima süngdakja aji azüokang" (Lipok 1:28).

Atsü-abung medemba sempet ajanga Tsüngremi meimchir taküm tasen yanglutsü agütsü. Satiba kübok tepela aser jangratema shilem agitsü Teyangluri Pa shisatsü nung iba nüngdak yayanglu. Asenok temenen nung tsükba ajanga atsü-abung medembaji menena kümdaktsü. Saka asenoki Pa sempet tajung mejungi amshiba temenen asoshia Yisu kangki nung asü.

Temeim Kibur, onok tebur aser tetsür yangluba asoshi Ne tenüng asanger. Iba atsü-abung medemba senti sempet Nai mulungba nung amshitsü onok dang yariang; Yisu tenüng nung. Amen.

SC nung Khristan ka judge shimba atema Khristantempelateper

New Delhi, November 13, 2023 (Agencies): Supreme Court of India nung Khristan ka judge shimba atema linük nung Khristantem kanga pelateper.

Rajasthan High Court nung Chief Justice inyaka alisang, Justice Augustine George Masih-i Supreme Court judge inyaktsü tenangzükba agiogo. November 9 nü Chief Justice D. Y. Chandrachud-i ketdangsüa pa nem tenangzükba agidakja liasü.

November 13 nü osangbener den jembidang United Christian Forum (UCF) National coordinator, A.C Michael-i, "Iba telemtetba ya onoki pelaa agizüker. Justice Masih ya ochishia obendang agütsür ka lir," ta metetdaksü.

A.C. Michael ya Federation of Catholic Associations of the Archdiocese of Delhi nunga Tir inyaker. "Pa judge shimba ajanga India nung er ajaki ochi temeden imlatsü. Judge ka mesüra tongti menden atema shimba nungji yimsü den tesendaktep kecha mali. Nisung kati nendaka inyakba aser ochishia inyakbaji dang tongtibang," ta pai ashi.

Supreme Court nung law practice asür, Thomas Franklin

Caesar-ia, "Asen nisung (Khristan ka) tematiba judiciary (SC) nung shimbaji osang tajung," ta ashi.

Ajisüaka linük nung yimsü madak ozüngjisa temaba, ta pai ashi.

Dalit nung er temeden atema nokdaker Thomas-isa, Justice Augustine George Masih ya Punjab state nungi lir aser pai lawyer inyakba mapang nung aika ajangshiogo, ta ashi.

Thomas-i, "Pai sensakertem, meshimejungertem aser ola malirtem ano tajungba angatetsü ni imlar," ta metetdaksü.

Justice Masih ya 1963 küm March 12 nü Punjab kübok Ropar nung aso. Pa St. Mary's Convent School, Kasauli nung azüngba sülen Saifuddin Tahir High School, Aligarh nung schooling tembang. Pa ya science graduate ka lir aser tesüsa pai Aligarh Muslim University, Uttar Pradesh nung law azüng.

1987 küm nungi Justice Masih-i lawyer inyak aser Supreme Court nung küm aika law practice asü. Taküm May 30 nungi pa Rajasthan High Court nung chief justice inyaka liasü.



November 13, 2023 nü Mokokchung nung Mokokchung Town Ao Baptist Churches Mission (MTABCM) pur küm shia agiba lokti senden yangi Yimyu Baptist Arogo nung akadang MTABCM mendenbuba, Puryapang aser tezülur, Sentianger nati anir telok külemi tangokba noksa nung angur. MTABCM ya Arogo 10-i Tsüngremer wadang balala telungjem nung inyaktsü nükjidong nung tentetba lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Semnang

(n) alu azüdang süngtoklitok bendena tarungtsü ayuba (debris collected for burning in field)

* Semnang arungdak mersü kanga junga meya atanger.

Semnü

(n) kilem nung au tayama taju asem juteta ayuba (three pieces of split bamboo place in roof top)

* Semnü ya Aor ki kilem nung topur ajungtsü enoker.

OLONG PAITEP # 6615

1		2				3		4		5
				6						
	7		8							
9					10			11	12	
			13			14	15			
16					17			18		
			19			20				
21		22								23
24										

TIPIEN

- 1. Saku - (4)
- 6. Songjen - (7)
- 7. Mali/Tazüing - (4)
- 9. Tasen apok - (6)
- 11. Songtem - (3)
- 13. Ata liasü - (5)
- 16. Tzünglu den külemi süker - (3)
- 17. Aso tila - (6)
- 20. Tashi maküm - (4)
- 24. Tenüing kasa jatepba - (7)
- 25. Ki yangluba oset - (4)

LANGTSÜNGLEN

- 1. Taksep - (3)
- 2. Langtem - (5)
- 3. O tamendaktak - (4)
- 4. Nütsü tebuba - (3)
- 5. Anüing dang tesangwa - (3)
- 6. Apitet - (5)
- 7. Yagi jungdaksür - (4)
- 8. Anogo semer ka - (3)
- 10. _ _ _ tatsü - (3)
- 12. Tebur kidong aser zünga kasa tsüingda jatepba - (4)
- 14. Pela agizükba tapu ka - (5)
- 15. Tenüing atet - (3)
- 18. Mejanga onü - (5)
- 19. Talak techira - (4)
- 21. Maneni - (3)
- 22. Nübo teyi - (3)
- 23. Meshi - (3)

OLONG PAITEP # 6614 TELANGZÜBA

TIPIEN :

- 1. Alang, 3. Pakti, 7. Bangka,
- 8. Sar, 9. Menungrar, 10. Pen,
- 14. Kümzü, 15. Anema,
- 16. Kimen.

LANGTSÜNGLEN :

- 1. Amena, 2. Aibelen, 4. Ayak,
- 5. Tenyar, 6. Ngs, 8. Sangküm,
- 9. Menden, 11. Kilen, 12. Aküm
- 13. Ama.



ALOKBA-I MODI DANG KANGA JASHIA PHONE ASÜR

Alokba : Hellooo...Ni Mr. Alokba... Ni Prime Mister Modi-ba den khen jembinur aja....???

Modi-ba : Hellooo...Ni Prime Minister-bai langzür ako...Hang na kechi shirnur'ar shiangjo ???

Alokba : Sir...Ozü Naga nungner nem 'Solution'-to kodang agütsütsüba.... Yamai menua ayur ...??? Ozü Naga nungner MLA-60 prongla-to 'Solution' meji nung opposition maliba sorkar ka yanglur atadar-ko-di.... Ashiko ano tera menu nungbo linük tenzüker-jia 'Faction' talila kar akümstüba atongtet nungbo...!!! ...ta shisabulur...Kechiba süra linük tenzüker-tembo ka küma longjemmer nokdak nungang takok angutsüba sernung longjemtsü tasak.... Saka MLA-tembo 'Rulling' o 'Opposition' balala lemsar nokdak nungang nubur ajangzüksüba sernung... Parnokbo mela-mela ka küma longjemmogo...Longjem nungang ajangtsüpur melongjemteter... Saka balala asünung-ang ajangtsüsubapur-bo mela-mela longjemmer....ta asüba yagi ozü lima majunger aja.

Modi-ba : Ena...Ner Naga nungner Solution-ji ajak tik-tak renemer... Joko bener yoktsüba dang jungjunga aleper yua lir... Saka ni tsübua bilemba kaji... Solution talep jagi ner Naga lima matongdang... Ner Naga nungner raratepa/kahtepa sümatsü tsübua bilemer aja.

Alokba : Eeessh...Nai yakta meyokra onok China - Japan - Korea nungner ajaki arung ta ajar-ji Parnok dangi aotsüba...Bedding-siting ajak tik-tak renemer tapusotsüba tang lirko-di.

~ Lilir : L. Kika Pongener.

Mulungnen

"Kechiaser ibai Tsüingrem teti tatem maka asen Tsüingremji lir; tatem tashi pa asen leniba alitsü. T.Ken 48:14"



ASÜ : 07.11.2023

Asür Mr. Nungkumtoshi, tebu tenüing asür Purnungsang, Kangtsung, pa shiranga alidang aser asüko ajurudang kija, kibong, kiyonger, lokti tentet balala aser Arogo balalai ozü nungita yaritepba aser temulung süngzüksüba asoshi kangasa pelar ta shiner.

Onoki nenok kija aser lokti ajak tenung magütsüteter saka iba osang ajanga ajak dang, nenoki meimba aser aria bilema yariba ajanga onok tepela periogo ta nenok ajak dang temulungjang ajunga nungi kangasa pelaba metetdaksür.

Nenok temiem onoki kodanga mamatsü, tematiba Tsüingremi nenok kija, kibongtem aser lokti ajak moajangma.

~ **Temiem Kinungtsü, Tanurtem aser Kinungertem.**

DEPARTMENT OF INFORMATION & PUBLIC RELATIONS AND DEPARTMENT OF TOURISM, GOVT OF NAGALAND PRESENTS

HORNBILL INTERNATIONAL PHOTO FEST 2023

THEME: NATURE'S CANVAS - CELEBRATING THE BEAUTY OF NAGALAND

OTHER AWARDS
 BEST PORTRAIT 10,000
 BEST LANDSCAPE 10,000
 BEST WILDLIFE PHOTOGRAPHY (NAGALAND-BASED): 10,000
SEND US YOUR ENTRIES AT
 hipfestnagaland@gmail.com

CONTACT US
 +91 9436005669
 +91 8837262093

SCAN HERE FOR MORE DETAILS

26 NOV 2023 ENTRY DEADLINE

**FIRST PRIZE: 40,000
 SECOND PRIZE: 25,000
 THIRD PRIZE: 15,000**

Kuki National Organization defence secretary asüba mangyimer

Imphal, November 13, 2023 (Agencies): Kuki National Organization (KNO) nung Defence Secretary Thongsei Haokip mapang talangka shiranga arur November 13 nü asüba atema mangyimer ta United People's Front (UPF)-i metetdaksüogo.

UPF aser KNO ya Kuki telungpur teloktemi tentetba lokti ana lir aser parnoki India sorkar den Kuki-Zo yimtenren tebilemstü atema yimjung olemtep tenzüka lir.

KNO nung Defence Secretary Thongsei Haokip ya bendanga agüja lennir ka liasü aser pai kanga dang

tasü itta aser temulung lemteta Kuki-Zo yimtenren mapa atema inyaka aru ta UPF Chairman ST. Thangboi Kipgen-i ashi.

Kuki putiotsü nung pa indang senmang teti alitsü. UPF aser KNO lennirtemi Thongsei asüba ajanga ongdang tulu adokba menembangtetsü, ta pai ashi.

Kuki National Front (KNF)-ia KNO Defence Secretary asüba atema mangyimba metetdaksüogo.

Kuki National Front ya UPF kübok India den suspension of operations nung lir.

Onoki kanga meima aliba KNO

Defence Secretary Thongsei Haokip ajangbena asüba osang angashia temulung raksar, ta Information and Publicity Secretary, Lh. Stephen-i ashi.

TS Haokip ya lennir tajung ka liasü aser pai kanga bendanga agüja inyakogo, ta pai ashi.

Pai Kuki-Zo armed movement asoshi nendaka inyakogo, pa dak asayamenü liasü aser temeim agi asüingba temulungjang liasü. Pai toktsür aoba kinungtsü aser kinungertem de asükhu lemsateper, ta KNF lennir Lh. Stephen-isa metetdaksü.

Myanmar army aser telungpur khatepba ajanga Mizoram security akangshir

Aizawl, November 13, 2023 (Agencies): Myanmar nung junta army aser pro-democracy telungpurtem tsüingda raraba ajanga Mizoram kübok India-Myanmar arrtsülen security akangshiogo.

Deobar nungi Myanmar nung kanga khateper aser iba jagi Mizoram kübok Champhai district

ketdangsurtemi kümdanga alitsü osang metetdaksüogo.

India-Myanmar arrtsü anasa aliba Myanmar senso noklang aika Mizoram nung arua jenokogo.

Osang angazükba agi Myanmar army aser Chinland Defence Force (CDF) züingsemtem tsüingda khateper.

CDF ya pro-democracy telungpur telok ka lir aser 2021 küm

tentet. Parnoki Myanmar nung army anema noktaker.

Myanmaese air force-i India den international border anasa Myanmar nung bomb pokdaksür ta osang ajanga ashi.

Ajisüaka Mizoram kübok Champhai district nungbo nisung asüba mesüra kiojen raksaba osang kecha mali.

UK home secretary Suella Braverman mapa nungi anentsü

London, Yimpoksüi/Nov. 13 (Agencies): Suella Braverman-i No 10 ashi manga longkak aitba mapang Met Police temi tim masüba mapa inyak ta aitsüba mechi home secretary menden nungi anentsüogo.

London nung hopta tatemlen longkak aitsü lia Braverman-i tensa tamajungba kumdakja article ka zülü ta aitsür.

La melen James Cleverly shimogo aser meimlai aliba taoba ato kilonser David Cameron-i pa melen foreign secretary inyaktsü.

Home secretary inyakba ya kü takum nung maongka tulutiba liasü, ta lai ashi.

Braverman anentsüba sülen UK Ato Kilonser Rishi Sunak-i Cabinet nung temelenshi benoka liasü.

"Kedangsürtem melentepba ajanga mapang talangba asoshi linüki temelenshi nungdaka aliba ama inyaktsü atema ato kilonser nem telungjem aliba telok ka agütsür," ta ato kilonser indang odongtari ashi.

2016 küm ato kilonser menden nungi aluba sülen Cameron ya Parliament nung meliasü, saka pa mapa tasenba inyaktsü asoshi House of Lords nung menden ka agütsüogo.

Liberal Democrats temi Cameron shimba nokdangtsü akhanger aser pa ajanga Greensill Capital finance company laodaktsüba athishia jembir.

Labour indang National Campaign Coordinator Pat McFadden-i ashiba agi, Cameron shimba ajanga Troy küm 13 tashi tamakok nung aliba melentsü ta ato kilonseri temenünütsü o jembiba asangsang akumer.

"Hopta ishika tejakdang Rishi Sunak-i David Caneron ya status quo tamakok anguba nung shilem liasü ta shir tangbo pa ano tanaben anioker," ta McFadden-i ashi.

Cleverley-i foreign secretary ka ama tenzükba ya maongka tulu aser home secretary mapa ya jangratemtsüka liasü ta ashi.

Taoba Ato Kilonser Liz Truss-i home secretary mendeni aniketba sülen Braverman ya Conservative party nung temeden asoshi ochi nung nokdaker ka ama repranga liasü.

Braverman-i mapangtong nung ashitsü aika lir ta ashiba ajanga lai ano lenirtem nem timtem agütsütsü ama bilemer.

The Times osangkaket asoshi lai olemsapang ka zülüba nung police tem anatsü nok ama lir ta tai tonglokja right-wing longkak aiter bhukuma zülüba sülen yimten yimsüsüba nung rongrongshirong adoka la mapa nungi anentsüsa akum.

Iba olemsapang ya No 10 (UK ato kilonser aliba tesem) nungi temelaba mali aser mapang tatsüka lir Downing Street ajanga iba olemsapang mezülutsü mepishiba Braverman-i magizük ta temai adok.

Labour, Liberal Democrats aser Troy MP kari Suella Braverman ya mapa nungi anentsütsü khanga liasü.

Russia nunger sepaitemi Idlib nung telungpur 34 tepset

Idlib, Yimpoksüi/November 13 (Agencies): Syria kübok Idlib governorate nung tesem kar anüng ajanga amakba mapang Russia nunger sepaitemi telungpur 34 tepset aser 60 dak tema yiruja liasü, ta Russia indang Interfax sangdong ka ajanga metetdaksü.

"Russian Aerospace Forces-i, Idlib province nung ozüing alema inyaksangshiba telungpurtem amenoka aliba tesem ka anüng ajanga makogo. Item teloktem yagi Syria sorkar sepaitem amenoka aliba tesemtem maka liasü," ta Rear Admiral Vadim Kulit-i Honibarnü tesem balala amakba indang ashiba Interaxisa metetdaksü.

Kulit-i ashiba agi, ghonda 24 tsüingda Syria sorkar sepaitem amenoka aliba tesem balala tenetben tashi maka liasü.

Idlib aser Aleppo provinces nung sorkari atsünger aliba tesemtem amakba atema Syria army-i telungpurtem dak tai

tongloksüogo, shirnoki parnok ya Islamist jihadists tem ta shia arudar. Telungpurtemi azüoker aliba tesemtem nung civilian tem aliba tesemtem kecha taochi makai amak ta aitsüba Syria army-i magüzüki liasü.

Opposition ketdangsürtemi ashiba agi, Gaza nung mangatettep adoker aliba maongka agia Moscow aser Damascus nati iba tesem taochi makai amaker, kong Syria tir Bashar al-Assad kübok alitsü memulungba nübur million asem dak tema lidar.

Ozüing alema Syria indang airspace nung tayimtsü aser drone tem yimzüdaktsüba atema US-i aniba teloki Russia aitsüba dak sendakba nung Kulit-i ashiba agi, jet aser drone tem yimzüdaktsüba ya aika Russia den kecha tesendaktep mali.

Taoba mapang source kati Reuters dang ashiba agi, United States-i Syria nung Iran-i teyari agütsüba teloktem tayimtsü amshia anaben tashi makogo.

'Janjatiya Gaurav Diwas' anogo nung ajak dangi salem abener'

Grand Opening of Tribes India Store

on 15th November, 2023
DUDA Guest House, Kohima, Nagaland

Narendra Modi, Prime Minister

“Linük jabaso, temelenshi bener arutsür Bhagwan Birsa Munda matsüngdak ni apudaka akum agütsür. November 15 ya India indang tribal tradition tushiba anogo lir. November 15 ya 'Janjatiya Gaurav Diwas' ta sangdongtsü ozü sorkar maongka anguba asoshi temolung süa bilemer.”

Visit tribesindia.com or Tribes India Showrooms across India
To locate nearby showroom visit <https://trifed.tribal.gov.in/retail-outlets-list>

Connect with us @tribesindia #Vocal4Local #BuyTribal

Gaza nung UNRWA nung inyaker 100 dak tema süogo

Gaza City, Yimpoksüi/Nov. 13 (Agencies): UN Palestinian refugee agency Geneva nung aliba UN (UNRWA) indang odongtar Juliette Touma-i osangbener dang ashiba agi, tanü ya alima ajunga nung mangyimba anogo lir, kechiaser iba rara nung ozü züingsem tepseter aliba UN-i bilemteter.

October 7 nungi tenzüka tang tashinung UNRWA nung inyaker nisung 100 dak tema takum samaogo.

Gaza nung UNRWA dak tesem ajaklen nungi amaker, kechiaser UN facilities nung nisung 800,000 jungnüa jenoka lir aser yangji maneni amaker, ta Touma-i ashi.

"Facilities 60 dak tema nung kongshiogo. Aser tesüsa atalokbaji onok indang guest house ka nung staff tem mejanga lia yashinep asemben amak aser onok kangasa tia taka staff temi iba ki yutsür ghonda ka ser tesadang nung iba lendong ya atalok," ta Touma-i ashi.

"Ki o jen raksatsüba shilem 70 shi Wadi Gaza south tsütsü lir, anungji tiyonglen aser south tsütsü Khan Younis aser Rafah nunga amaker. Anungji Gaza nung kecha nunga teimla mali," ta lai ashi.

Gaza nung UN mapa inyaker nisung 100 dak tema asür nem akhum agüja United Nations nung mapa inyaker temi minute ka süngjema liasü aser UN flags tem tom nung mesanga liasü.

Israel-i tanen makai amakba mapang Palestinian refugee agency UNRWA

nung inyaker nisung 101 tepsetba tenüng nung Geneva nung aliba UN office staff temi candle tsükloka tekolak alileni alu.

"Mapang tatsüka tsüingta asen organisation nung aid workers timba tepsetbaji ibai alitsü," ta Geneva nung aliba UN indang director-general, Tatiana Valovaya-i ashi.

Rara adoka aliba telok ajak den osang lemsatepaka Gaza south tsütsü UNRWA indang facility ka nung Israel indang navy ajanga amak, ta ashi.

Deobarnü Rafah nung aliba guesthouse kanga sashia raksatsü, saka lendong ataloktsü minute 90 lia UN staff tem iba tesem nungi ainshia liasü, anungji asü-amaba mali.

Palestinian Health Ministry odongtar Ashraf Al Qidra-i ashiba agi, al-Shifa Hospital nung tesüba anogo asem tsüingta shiranger 32 süogo.

Asürtem ronung anojungi asoba kinü tanur asem dena lir ta pai ashi.

Gaza Strip nung mozüki tulutiba, al-Shifa Hospital nung tozü agimaba sülen Honibarnü nungi mapa meinyaker.

Iba mozüki telung nung shiranger 650, healthcare worker 500 aser pei ki yutsür arua jenokba nisung 2,500 shi lir, ta iba mozüki indang director Mohammed Zaqout-i ashi.

Hopta tatemlen iba mozüki nung shiranger nisung 1,500, medical worker 1,500 aser tesem balala nungi arua jenokba nisung 7,000 shi liasü.

Nagaland CM Rio-i state of art sports facility 5 lapoktsü



Dimapur, Yimpoktsü/ November 13 (TYO): Nagaland Chief Minister Neiphiu Rio-i Hombarnü, indoor stadium development programme mezüngbuba phase nung shilem ka ama Nagaland nung aliba lanurtem atema state of art sports facility pongu lapoktsüogo.

Tanga multi discipline sports stadium pezü ya Niuland, Noklak, Tseminyu aser Tuensang district tem nung virtually lapoktsüogo.

Chumoukedima nung Multi discipline sports stadium lapoktsüba sentong nung o jembiba mapang Rio-i, item stadium tem ya modern stadium tem lir aser item nung ya asaya tapu balala asayatetsü. Kasa facility ya tanga district ajak nung amenoktsü aser district kar nungbo saisapong nung infrastructure aika agütsüogo, ta ashi.

Paisa, sorkari Special

Assistance and Innovative Programme kübok 2021-22 tsüngda stadium trok atema sanction sütsüogo aser unit shia nung sen crore 3.50 intoktsü. Taküm ano tenüngdakba apir state kübok tesem balala nung multi discipline sports stadiums ter atema sanction sütsüogo aser Youth Resources & Sports department-i asdangdar, ta ashi.

Rio-i ashiba agi, tarutsü nung state-i tongtibang national aser international asayungtem ayongzüka asayanüra item atema mejeta saisapong facility tem nüngdaker, anungji sorkari multi sports infrastructure tem yanglutsü atema rangloker inyakdar.

Chief Minister-i Chümoukedima district ya 'Sports & Education City' ama bendanga agütsüogo. Tanga district temia parnok terenlok asoshi sector tapettem bushitetsü nüngdaker. Iba

facility ajanga Chümoukedima district nung ano Regional Centre for Sporting Excellence atema tongtibang tenüngdakba ka bendenloksür, ta pai ashi.

Pai ashiba agi, state sorkari tang aliba sports policy tem yanglushia comprehensive sports policy ka benoktsü merangdar aser iba ya taruba budget session nungbo agizütsü imlar.

Sentong nung mejeta jaoker Secretary General, Nagaland Olympic Association & Vice President Athletics Federation of India, Abu Metha, Chümoukedima Village Council Chairman aser Angami Public Organisation tir Razouvotuo Chatsu nungeria o jembia liasü.

Sentong nung Advisor Youth Resources & Sports, S. Keoshu Yimkhuing-i lokti pela agizükba o jemi aser Director, Youth Resources & Sports Kethosituo Sekhose-i department indang presentation ka agüja liasü.

Prannoy aser Sen naprongla Japan Masters Super 500 asayatsü

Yimpoktsü/November 13, 2023 (Agencies): India nunger rongnung temaba jenjang nung aliba badminton asayar H S Prannoy yirur mapang tatsüka masayai lir tang Japan Masters Super 500 tournament nung asayatsü aser iba asayamung nung Lakshya Sen-ia shilem agiba angutsü. Iba asayamung ya Mongolbarnü tenzüksü.

Taoba ita Asian Games nung bronze medal anguba sülen Prannoy teberem yiruba ajanga Denmark aser French Open nung masayateti liasü.

Arishi küm 31 tain asayar yagi küm 41 sülen Hangzhou Games nung India asoshi tebur kija asaya nung mezüngbuba medal ngua liasü.

Japan Open nung World Championships bronze medallist ya Hong Kong nunger asayar Lee Cheuk Yui den mezüngbuba asayatsü.

Iba asayamung ajanga Sen aser Kidambi Srikanth na nema ranking points angutsü asoshi maongka agütsütsü

kechiyong Olympic qualification mapang May 1 nü tenzükgogo aser taruba küm April 28 nü tembangtsü.

Atakzükja aliba mapang tsüngda world rankings nung top 16 nung alirtem Paris nung asayatsü asoshi maongka agutsü.

World No. 8 Prannoy bo Olympic qualification bracket kübok lir ajisüaka Sen (No. 17) aser Srikanth (No. 23) na tang tashi jenjang mejangjai lir aser Paris nung asayatsü atema taruba asayamungtem nung ranking points bendentsü nüngdaker.

2022 Commonwealth Games gold medallist Sen-i, July ita Canada Open akokba sülen takok tajung monguteti arudar. Pa taoba asayamung pezü tashi nung mezüngbuba round nung tsükogogo, kong Hong Kong Open Super 500 nung pa indang opponent nem walk over ka agütsüba densema lir.

Japan Open nung pa Japan nunger asayar Kodai Naraoka den asayatsü. Sen-i world No.

5 Japan nunger asayar ya January ita Indonesia Masters nungbo koker lir.

Kasa mapang nung Srikanth-a Olympics atema qualify asütsü asoshi iba asayamung nung junga asayatsüsa akümtsü aser pa mezüngbuba round qualifier ka den asayatsü. India nunger rongnungi ano Priyanshu Rajawat-a mezüngbuba round nung Chinese Taipei nunger Lin Chun-Yi den asayatsü.

Olympics nung medal ana tashi ngur alila PV Sindhu iba asayamung nung seed tibuba asütsü aser India tsürtem rongnungi la kija iba asayamung nung shilem agitsü. La mezüngbuba round nung Denmark tsür Mia Blichfeldt den asayatsü. Sindhu-i world No. 18 Danish tsürta ya 6-1 ta koka lir.

Tebur tarep asayar Satwiksairaj Rankireddy aser Chirag Shetty na mezüngbuba round nung Chinese Taipei nunger Elu Ching Yao aser Yang Po Han den asayatsü.

Cole, Rico, Ezri nung England team nung züngoksemogo

Yimpoktsü/November 13, 2023 (Agencies): Chelsea nung asayar Cole Palmer, Manchester City nung Rico Lewis aser Aston Villa nung asayar Ezri Kona nunger tang mezüngbuba England team nung züngoksemogo.

Iba ita Malta aser North Macedonia den European Championship qualifiers asayatsü aliba atema parnok team nung züngoksemogo, ta Football Association (FA)-i Hombarnü sangdong ka ajanga metetdaksü.

City nung Chelsea nung oa adenba sülen Palmer-i tang tashi nung league nung goal pezü idaktsür lir, kong team ana Deobarnü goal 4-4 agütsür tembangba asaya nung goal ka idaktsüba densema lir.

Villa pur tang league nung jenjang pongububai atuba nung arishi küm 26 tain Kona-i tongtibang shilem agiogo. Kasa mapang nung arishi küm 18 tain Lewis-a Premier League champions City nung tetoktepba ajak nung 10 ben asayar lir.

Mezüngbo team nung James Maddison, Lewis Dunk aser Callum Wilson nunger züngoksemog liasü saka parnok yiruba ajanga masayatetsüsa kümogo.

Real Madrid nung asayar Jude Bellingham-a yiruba ajanga asayatetsü

masayatetsü mejangjai liasü saka pa-a team nung züngoksemogo.

England pur Group C nung Malta den Hokolbarnü asayatsü aser iba sülen taruba Hombarnü North Macedonia den asayatsü. Gareth Southgate-i aniba team ya Euro 2024 finals atema qualify süatokogogo.

Squad:

Goalkeepers: Sam Johnstone (Crystal Palace), Jordan Pickford (Everton), Aaron Ramsdale (Arsenal)

Defenders: Levi Colwill (Chelsea), Marc Guehi (Crystal Palace), Harry Maguire (Manchester United), Fikayo Tomori (AC Milan), Kieran Trippier (Newcastle United), Kyle Walker (Manchester City), Ezri Kona (Aston Villa), Rico Lewis (Manchester City)

Midfielders: Trent Alexander-Arnold (Liverpool), Jude Bellingham (Real Madrid), Conor Gallagher (Chelsea), Jordan Henderson (Al-Ettifaq), Calvin Phillips (Manchester City), Declan Rice (Arsenal), Cole Palmer (Chelsea)

Forwards: Jarrod Bowen (West Ham United), Phil Foden (Manchester City), Jack Grealish (Manchester City), Harry Kane (Bayern Munich), Marcus Rashford (Manchester United), Bukayo Saka (Arsenal), Ollie Watkins (Aston Villa).

1buba Amateur badminton Championship tembangogogo



Dimapur, Yimpoktsü/ November 13 (TYO): Six Wonders Shuttlers-i ayongzükgba 1buba Amateur badminton Championship November 10 aser 11 nü takok ngua asayaogo. Iba asayamung ya tebur tarep asaya atema liasü.

Badminton Championship ya Chungaizaeng Rongmei Colony, Burma Camp nung asaya liasü.

Asayamung lapokba sentong nung Dr. Yanbemo Ovung (Sr. Associate Pastor, Lotha Baptist Church Dimapur)

alakteta jaoker liasü. Asayamung nung ajak senter team 26-i shilem agi. Iba asayamung ya Bikha aser Sandip nati akok aser Tokito aser Hukivi na tanabuba jenjang nung liasü.

Asayamung akokba team nem senpet sen 12000 aser tanabuba jenjang nung tembangba team nem senpet sen 8000 agüja liasü.

Maneni semifinal tonga asayar Wapang aser Tenshi o Atoka aser Vipu nunger nema senpet sen 2000 agüja liasü.

BILEMDANGANG

"Tanü nü inyakyim agi tangra ka khuret pongbadakjang."